

小倉山房詩文集

冊
五

卷之四

小倉山房續文集卷二十五

錢唐袁枚子才

坐觀垂釣賦

爲莊念農作

子才子息志塵鞅棲神元妙迴謝軒冕日事漁釣過其友莊先生而傲之曰子亦知夫釣之樂乎當子之猗膏棘軸而遨盪於康衢也吾則琅玕三尺冰蠶一絲馳波跳沫與水爲嬉當子之僕邀相從跼踖參衙府而不得舒也吾乃投亞九飯祝一鮒魚伸眉肆肘天不能拘思子之樂樂不我如胡不易子之所事而娛吾之所娛莊先生曰不然吾聞好汭者溺好獵者驚當局者悞旁觀者清故五采之藻袞服之者不見而見之者耀焉五音之笙簫吹之者不聞而聞之者妙焉當夫霜竹浮陰風梧散葉夕照千里碧雲一色水蕩影以鱗鱗魚浮空而戢戢乃命童子坐危石俯深流投醜扇以爲餌削焦銅以爲鉤或沉或浮載泳載游余不持一綫但瞪雙眸試操縱之有道任貪廉之自求彼得吾不喜彼失吾不憂杼澹觀於物外何筌蹄之足謀於是神如東王公之鯉大如任公

子之鰲年如姜尚父之老臺如嚴子陵之高入吾目今不過一瞬當吾坐兮不
過終朝釣鯉魚而無羨乎尼父會大都而奚夸夫魚刀子但知垂釣之樂而烏
知吾坐觀垂釣之逍遙子才子於是嗒然意失攔然神爽結葦蠟蘆投繩釋網
叩舷而歌曰巧人之巧坐而息兮拙人之拙垂竿立兮吾欲作書與魴鯉慎出
入兮展如之人大巧而有愚色兮

笑賦

陸大夫本無笑疾養空而遊所見人士與己不侔但覺其蔽莫測其由付之一
笑啞啞不休則見夫金穴方崩銅山又起屢覆前車仍循舊軌廣斟雉膏甘焚
象齒豈知有造必化無泉不瀉縱置筦鑰於枕邊難挈分文於泉下贈百萬與
何人無一言之報謝又見夫捨樂土趨熱官自投苦縣自上危竿取下千怨博
上一歡或同謀而異獲或始笑而終嘆從高墜者輒碎泛海泊者大難然後鶴
唳思聞葦蕘想餐不已慎乎又見禁忌百端福田是慕不學顏含思尋管輅王
莽所信陰陽小數治行則黃曆少日卜葬則青山無墓見術士而頭低望神巫

而却步百鬼集於胸中五行遮其前路捨王道之蕩平墮終身於雲霧又有蒲博呼盧葉子作戲每一登場如厖止吠眸子營然神魂囚繫屏珍羞以忘餐置妻孥而若棄一息尙存六時不廢試清夜以捫心終不知其何味又有丹訣大悟蒲團小參受錄自喜長齋自甘捨名教之樂地誦梵咒之喃喃斬半菽於戚里揮萬鎰於伽藍廣陵則妖亂有志臺城則餓死難堪凡此千秋之惑皆由一念之貪至於誦習詩書曠覽宇宙何必鉅創苛碎清臚似豆披膩顏衿遂康成後黨枯骨以死爭抱陳編而苦鬪卒之古人不生長夜不晝徒相毆於昏黑終不知誰之勝負亦有囿於習而心昏縛於教而自束繩趨溝衷龜腸蟬腹理不經於心見不出於獨寧顯悖夫周孔懼小違於濂洛如蠶蟲之藉角作耳如水母之以蝦爲目甚至八翼冲舉一行未讀相引爲曹高冠簇簇方且選才俊而秉鈞軸焉若諸人者紛紛藉藉究居居其氣多滯其質本愚雖有盧扁之藥不能祛其疾惠莊之辨無以釋其拘君子洞觀物外手暗揶揄不得已而虛舟相值愧謝不如拈花無語舉杯相於惟齋然與莞爾不能忍於須臾

刑部尙書加贈太傅錢文端公神道碑

今天子優禮文臣稱爲江浙兩大老者一爲沈公德潛一爲錢公陳羣沈年雖高于公爲後進受知 今上而公則受知 聖祖 世宗贊國家文明之治先沈二十餘年故薨後 天子加贈太傅賜祭葬諡文端崇祀賢良一切恩禮較沈爲尤隆非徒眷舊臣兼以重 先朝也公爲錢武肅王十四世孫高祖富一公始遷秀水生而敦敏愛讀書母陳太夫人躬自課督公貴後繪夜紡授經圖皇上題詩獎許以康熙甲午舉人辛丑進士改翰林庶常 世宗登極召見曰錢陳羣不獨文佳人亦好遂以編修主試湖南旋遷學士視畿輔學政乾隆元年擢通政司右通政丁母憂服闋補原官累遷禮刑兩部侍郎加經筵講官充乙丑會試總裁主江西丁卯庚午兩科鄉試壬申病 上命太醫診視予告歸里公天才警敏藻思盈湧每扈從賡歌帳殿前諸黃門環而伺之晷刻未移百韻已就歸田後 上有吟詠輒寄示公絡繹往來至千餘首凡國家大禮畢武功成公必進雅頌數十章 璽書褒美賞賚不可紀極辛未南巡 命閱召

試諸生卷丁丑南巡 命在家食一品俸壬午南巡晉刑部尙書銜乙西南巡
加太子太傅賜幼子汝器舉人辛巳祝 太后七十萬壽 命與九老會 賜
杖入朝辛卯祝 太后八十萬壽 命紫禁城瀛臺騎馬偕九老遊香山圖形
內府 上于公若有宿契每入見 聖心先怡公亦事君以誠承顏抗詞動引
書語頌不忘規民隱必告壬午公子汝誠典試江南 上先諭總督尹文端公
招公遊攝山俾父子歡會 聖壽六十念公老難北行 命沈文慤公往嘉禾
互相勸止公進竹如意 上批劄云未頒僧紹之賜恰致公遠之貢文而有節
把玩良怡今賜卿木蘭所獲鹿服食延年以俟清晤凡此 恩意周摯皆出於
尋常控揣之外龍光湛露海內榮之公雖研深文學而於政治尤通明雍正七
年爲陝西宣諭化導使宣講時有姦民某闌入聽講公異其狀命遮留之果邑
中捕者至乾隆十九年僞稿獄與公家居矣密奏姦民主名未立請緩窮治以
省株連奉 旨嚴飭俄而諒其誠悃 寵眷如初公任天而動倜儻和易口汨
汨如傾河汲引後進酬應翰墨必躬必親日不暇給然能廢心而用形人人滿

所懷以去而體益聰強構宅雙溪之西春秋佳日輒偕故人野叟遊桑麻間常至古杭聖湖小住信宿見者或以爲元老或以爲神仙幼有至性第死未殮公抱尸臥冀溫熨使甦太夫人至見公身冷如冰乃哭而止之官通政使時以應得己身封典請 封外祖母 上許之遂著爲令公諱陳羣字主敬號香樹又

自號柘南居士兩娶于俞氏皆誥封夫人三代贈如公官子七人長汝誠官刑部侍郎次汝恭汝慤汝豐汝隨汝弼汝器皆有官秩女九人薨年八十九葬

銘曰 文思天子張咸英臯陶庭堅方降生爽鳩氏代鳳鳥鳴奕奕錢公輔聖

清肫然明允更篤誠爲士作鑑文持衡有茅必拔賢必登義刑義殺廷尉平惟公折獄能引經天牢雖空臣疾攫昧死上疏求歸耕 上帝耆之詩寵行東門

送者車千乘爭羨白鶴翔蒼冥誰知在野如在廷堯釀舜薰時和賡君臣師友相合并四河入海無河名五年巡狩 鑾輿迎羣臣之中喜見卿子牟魏闕江

湖情能無銜感涕沾纓韋孟雖歸王室爭丹忱足照青史青傷哉顏光大耄驚

帝猶批勅期遐齡

龍章雖來臣目瞑中涓捧祭馳新塋有睟其容圖殿庭

龜銀後祚隆隆升實盱實覃多孫曾公委化矣公永寧

原任浙江巡撫盧公神道碑

乾隆四年兵部右侍郎盧公巡撫浙江枚乞假歸娶謁公於南衙一見如舊相識矜寵甚盛次年枚官京師聞公被劾天子命內大臣汪札爾往按其事獄兩月不具浙之氓呼呶罷市纂公於頌繫所舁至吳山神廟中供鋪糗粢盛者如牆而進所過處婦女呼冤躅足數萬人赴制府軍門擊鼓保留制府德公據實奏聞天子知公無罪而又不欲長黔首之刁風也遣戍軍臺一時朝野駭

公能得民枚亦疑公果何術以致之後四十餘年公子崧以貞石未建來索銘幽之文讀其狀方知公自縣令至任封疆忠勤惠愛終始一貫以故誠能動物應如肸蠁初非違道干譽之所能襲取於須臾宜備書之抒部民之思爲大臣之式謹按公諱焯字光植號漢亭奉天鑲黃旗人先代從龍世襲恩蔭祖崇興官江西布政使父承倫官大理寺少卿公生而岐嶷槃槃有才以功業自期初知武鄉縣縣有均徭錢供差費而遇差仍按里派夫公革除之有豪家莊頭倚

勢凌民公大創之有巨盜四十餘家公剿絕之遷知亳州州俗好鬪有白帽鐵帽諸黨公擒其魁餘黨解散擢知東昌府署登萊青道實授河南南汝道遷按察布政兩使巡撫福建 今上元年調浙江落職再起授鴻臚寺少卿巡撫陝西再落職 命往巴里坤哈密協理軍需事竣還家年七十五薨公抗爽而和與人語姝姝然不衣自暖然義之所在赴若江河之決武邑災公開倉賑飢東昌災公放隄水入運河飭各屬開倉賑飢俱不待報請便宜行事浙江海塘恃尖山爲保障壩工屢圯公親臨築成上喜 御製碑文以賜西陲用兵湖北奉部檄運歸化城米往軍前公庫道遠費重奏請以陝西采買者就近先撥 上嘉之謂深得大臣敬事之道當田文鏡總督河東時政尙苛嚴司道以上莫敢撓其鋒東昌一郡所訪至二十餘案囚纍纍獄不能容公到登時判遣囹圄爲空田心銜之卒亦無如何也公爲政大概以膽決濟其仁心福建前任撫臣奏建寧田糧較明季少十之五六部議按畝均攤公奏請先丈量而後酌增 上許之丈無虛浮其事遂寢鹽販拒捕有登山者總督某欲用兵公止之而密遣

官禽獲首犯分別杖懲卽時案結豫省黃河遷徙無常兩岸爭地訟牒僨輿公曉以漲則升科坍則豁免一言而訟息湖州費氏大族也有兄公某訟其弟妻李氏之姦公不忍以曖昧事污人名節爲平反之竟以此獲譴然有識者觀公之過知公之仁公揚休玉色軒軒霞舉長鬚飄然望而知爲公輔從武鄉運餉入都年纔強仕 世宗召見卽賜飯賜豐貂墨刻香珠等物捧至殿外又喚入命開寫年庚具奏嗚呼公日後麾旄擁鉞垂三十年皆由此時特達之知然以縣令微員薦引無人而簡在 帝心一至於此雖公之儀狀奏對必有異乎尋常者而卽此可想見 世宗之聖德如天求賢若渴矣遭逢之盛至今聞者猶爲泣下所著有觀津錄牧毫政略秉臬中州錄撫閩撫浙略數十卷配周氏以 覃恩誥封夫人副室崔氏以子貴 誥封宜人皆以己丑年四月合葬於拱極山之高原禮也子五人長山蔭工部主事次崧官衛輝太守次嶠次嶠次蚪女六人孫九人

銘曰屋漏在上知者在下主恩易邀民口難借翬翬盧公氣如春夏弊絕吏瞿

樂與人化鏡磨愈皎衣涅不緇屢起屢蹟未見其施人爲公惜公獨道然委運任化知我者天天眷良臣令終壽考樹蔭幽宮鶴歸華表

經筵講官兵部尙書彭公神道碑

乾隆四十九年六月兵部尙書彭公薨於里第遺疏上聞 天子震悼一時士大夫走位相弔泣且歎曰 先皇帝老臣盡矣存者惟嵇相國爲先輩而彭公科尤先海內望之如晨星孤月倘假一二年重宴鹿鳴瓊林豈非 熙朝盛事而天偏靳之悲夫然公之清節重望恩榮壽考於古爲稀勒之貞珉備國史之採不可廢也其同館後進袁枚受公知五十年爲按其狀而銘之曰公諱啓豐字翰文應鄉舉時芝生庭中因自號芝庭先世由江西遷蘇郡之長洲祖定求康熙丙辰會試殿試俱第一父正乾考授州同知三世皆以公貴誥贈光祿大夫吏部右侍郎公貌清羸長不踰中人而風骨珊珊如鷺飛鶴翔凌風欲去雍正三年舉於鄉四年會試第一殿試亦第一大學士張文和公奏科名與而祖同 世宗喜卽召入南書房七年充河南鄉試副考官時未散館而有是命皆

異數也十三年遷左春坊左中允 今上登極之元年遷侍講累遷至侍讀學士通政司左通政吏兵刑三部侍郎尋授兵部尙書充經筵講官 兩聖人知公廉明能文章凡掄才大典倚公如金鑑 命校順天鄉會試者三主直省試者七視學政者二經歷滇南中州江右山左浙西輶軒所臨庶士懽迓其他讀卷 殿上及闋回避拔貢教習朝考召試諸卷皆疊次任委連綿不斷公亦飭躬齋心克與 上意相副從江西還奏所過宿州有司賑災不實又奏請勅各省學臣見督撫毋卑詔應遵會典儀適 上是之在浙時奏官河宜開濬漕費宜遵舊制毋浮收本省官出巡應額限役夫毋過千名任兵部時奏武職銓補遲速不均宜與卓異官均以雙單月輪班間用奏馳驛官奉使者有廩給口糧而夫役俱向驛站借雇慮開多索濫應之漸宜停例支改一馬三夫 上皆可其奏發部議施行當是時 上方嚮用公適有同部兩侍郎不相中造蜚語聞上引公爲證 上問公公對未聞 上疑有私降爲侍郎越二年以原官休於家先是公乞養歸爲娛奉太夫人故簣山濬池蒔花竹極園林之勝至是再

歸山水益清幽樹益茂公擁萬卷嘯哦其間雖大耋聰強不衰或春秋佳晨出
遊石湖寒山士女皆知兩朝元老擁觀塞路初公侍 內廷時 世宗賞大臣
福字偶未及公 特手書以賜侍今 上泛舟賞花釣魚 命和詩至二百餘
首所賜珍玩無算祝 皇太后萬壽與九老會圖形中禁金川蕩平公迎 駕
山東進凱歌 恩復尙書銜與宴在江南三次迎 鑾皆召見 溫諭四十九
年公迎 駕跪龍泉莊 上遙望見卽 命侍衛扶起 命秋冬北上與千叟
宴公方感 上恩修安車欲行未及期以無疾終年八十四性峭直稍不可於
意卽形詞色然過後輒不省慊慊自下遇布衣文學之士皆抗禮與鈞枚弱冠
入都卽奇賞之聞其入穀特呼車往賀主司得人晚年猶端書細字往來唱和
尤密常語人曰袁君非徒詩文佳也聽其議論如魯公書徹透紙背其見知如
此妻宋氏 誥封一品夫人子五人長紹謙山東桃源同知次紹觀翰林侍讀
學士次紹咸增廣生次紹升丁丑進士次紹濟尙幼女三人其一適常州學士

銘曰庭實九獻特達圭璋簫韶九成來儀鳳皇天生彭公爲世休祥履星辰上
立日月傍 帝畀玉尺東度西量公洗心眼清儷冰雪萬蟻戰酣一燈破黑拔
茅使高升珠使跳爛其盈門八座三貂抒所蘊畜施於爲政獬豸爽鳩屢拜
寵命周官司馬權重中樞公靜鎮之四海宴如 帝謂古賢七十懸車卿年已
屆可以歸歟公拜稽首 聖恩優老臣願歸田詠歌天保都人羨公祖錢盈道
一十七年烟雲花鳥臣請 主安 帝問卿好以其餘閒爲書院師胡瑗孫復
歐范優爲以其餘福蔭及孫曾玉堂蕊榜綿綿繩繩齊門之外新塘之東百尺
華表萬古清風

原任湖北巡撫太常寺少卿程公墓誌銘

公程姓名燾字九峯號雲軒系出新安之臨溪六世祖士麟遷杭州艮山門外
之笕鎮公生而孤露家極貧持缺盜盛淖糜母子分以療飢以戊午舉人補中
書軍機處行走遷武選司主事引見以御史用出爲甘肅洮岷道奏母老改江
南驛鹽道遷安徽按察使再遷布政使調陝西巡撫湖北剪辦獄起仍降江西

布政使補太常寺少卿以病免公性樸直粵曳任氣有所懷雖權貴前必達其
意任兵部事繁誤軍機處瀑直之期傳忠勇公語人曰九峯久不來想戀兵部
耶如彼處樂可不必再來軍機公聞之怫然曰兵部軍機皆國家事相公不當
分畛域之見程燾才拙僅能料簡一處無分身法卽遣人往軍機處取直宿行
李忠勇公笑曰人言九峯戇九峯又戇耶然其言甚正盍爲我婉留之同事者
再三云公始往公常言世之論仕者有二失焉其一以爲功名可力取也於是
通苞苴事造請以求之其一以爲功名不可以力取也於是玩時愒日而百事
廢焉不知不可求者官也不可不求者官之事也一階級有定數而可妄冀乎
一斛粟皆 君恩而可素餐乎以故公所任事專務先難從忠勇公傳恆平金
川從大司馬舒公赫德觀兵滇黔再從陝甘總督黃公廷桂平定伊犁經田葉
爾墩不阿克蘇地方繩行沙度二萬餘里心計手畫不知渴飢諸大臣倚賴甚
重節書士訖因覬深知松橋鞍擦峙六安州有河南祝姓者詐僞事發誣引河

常云周道如砥其直如矢凡斷案引律貴得大中不可上奏畏却因其輕用雖字以揚之欲其重用但字以周內之以故公折獄過慎夜閱決事比持燭折墜瞿瞿申旦勞積疾生舌本中穿漸裂以大醫曰此心血竭火憤興之故也竟以不起年六十四先娶金氏再娶胡氏子二長承獻次楷孫四人葬某銘曰晁晁而能行者真也隆隆而仍勞者勤也無裨政故能撫其軍也有仁心乃以偶其身也古而不今嗚呼哉其人也

廣東雷瓊道按察使司副使金公墓誌銘

乾隆丁巳予寓薦主金少司寇家見其從子序倫知原守濟南被劾歸旗貌軒偉甚口與余朝夕狎宴飲諧謔相得也已而起廢外用遂別去戊戌冬其子岳爲蜀中司馬寄信屬余銘墓余弱冠卽受司寇恩今老矣雖其家之一孽息一童孫有所誣諉誼不敢辭而況君與余素有撫塵之好者哉謹按君諱允彝字序倫一字懿亭鑲白旗人工部侍郎永錫公之孫宣化府厚庵公之子行六年未三十循例得南豐縣丞遷兗州府金鄉縣知縣辦災課最調宰蓬萊引見時